

tatibus et locis piis ab iisdem Capitulo et Canonicis nominatim et cum expressa mentione facultatis sibi per praesentes a Nobis impertitae, aliisque servatis, quae in Apostolica Constitutione fel. rec. Praedecessoris Nostri Clementis PP. VIII. die 7 Dec. anni Domini 1604 edita, quae incipit *Quaecumque a Sede Apostolica, praesertim circa gratuitam literarum expeditionem, iisque etiam, quae in decretis a dicta Congregatione Indulgentiis et sacris Reliquiis praeposita die 6 Martii anni 1608 et die 10 Aprilis anni 1729 editis statuta sunt, et non aliter, communicari possint et valent.*

IV.

**Summarium indulgentiarum ecclesiae Lateranensi  
et aliis ecclesiis eidem incorporatis concessarum.**

(*Ex Bened. XIV. Constit. Assidue sollicitudinibus  
d. d. pridie Nonas Maii 1751.*)

Motu proprio, et certa scientia, infrascriptas leges et ordinationes circa praemissa, praesentium Litterarum tenore et Apostolica auctoritate duximus statuendas.

§. 7. In primis videlicet, omnes et singulas indulgentias et peccatorum seu poenarum remissiones et relaxations, aliasque gratias spirituales tam pro vivis, quam pro defunctis, dictae Basilicae Lateranensi a Praedecessoribus Nostris Romanis Pontificibus concessas, quae jamdudum, ipsis Romanis Pontificibus scientibus et consentientibus, publice in eadem Basilica proponi consueverunt, etiamsi de illarum primaeva concessione certa monumenta nunc non appareant, praedictis motu, scientia, tenore et auctoritate approbamus et confirmamus, eidemque Basilicae, perinde ac si per praesentes ex integro ipsi concederentur, sine ulla contradictione competere declaramus atque decernimus.

§. 8. Quo vero ad eas indulgentias et remissiones seu relaxations hujusmodi, quae a praedictis Capitulo et Canonicis hactenus quibuslibet ecclesiis, altaribus, capellis, oratoriis, Confraternitatibus, aut locis piis ejusdem Basilicae membris eidemque subiectis et incorporatis, ubicumque existentibns, quorumlibet indultorum, privilegiorum aut facultatum vigore, sive generaliter et ad instar, sive specialiter, et nominatim communicatae fuerunt, sive etiam ex directa Romanorum Pontificum Praedecessorum Nostrorum concessione ad illas et illa extensae dici possent, quaecumque illae sint, Nos eas omnes et singulas, simili motu, auctoritate et tenore, interim suspendimus, et tamdiu effectu carere volumus et decernimus, donec, prolatis authenticis indultorum, privilegiorum et facultatum hujusmodi monumentis, de certa praedictorum Romanorum Pontificum Praedecessorum Nostrorum voluntate et concessione, quoad communicationes et extensiones hujusmodi, Nobis vel Successoribus Nostris, seu dictae Congregationi constiterit.

§. 9. Interea tamen, easdem ecclesias, altaria, capellas, oratoria, confraternitates et loca pia dictae Basilicae membra, hactenus erecta, seu eidem subiecta et incorporata, ubicumque existentia, Nos infrascriptarum indulgentiarum et gratiarum spiritualium, quae usque ad statutum suspensionis praedictae terminum valiturae sint, muniberis ditare decrevimus.

§. 10. Omnibus nimirum utriusque sexus Christifidelibus, qui illas et illa in Ascensionis Domini Nostri Jesu Christi, Nativitatis S. Joannis Baptiste, Sanctorum Apostolorum Petri et Pauli, S. Joannis Evangelistae et Dedicationis eiusdem Lateranensis Basilicae diebus festis, vere poenitentes et confessi, ac sacra Communione refecti, a primis Vesperis usque ad occasum solis dierum huiusmodi devote visitaverint, ibique pro sanctae Matris Ecclesiae exaltatione, haeresum extirpatione et christianorum principum concordia, pias ad Deum preces effuderint, quolibet ex diebus

praedictis, plenariam omnium peccatorum suorum indulgentiam et remissionem misericorditer in Domino concedimus et impertimus.

§. 11. Iis vero, qui in reliquis Sanctorum Apostolorum festis, nimirum Andreeae, Jacobi, Thomae, Philippi et Jacobi, Bartholomaei, Matthei, Simonis, et Judae, ac Matthei, vere poenitentes et confessi praemissa peregerint, septem annos et totidem quadragenas.

§. 12. Qui autem illas et illa a Dominica prima Adventus usque ad festum Nativitatis Domini Nostri Jesu Christi, et a feria IV Cinerum usque ad festum Resurrectionis Dominicæ, vere poenitentes et cum proposito saltem confitendi, visitaverint ibique, ut supra, oraverint, singulis diebus, quibus id egerint, quatuor annos et totidem quadragenas, in reliquis autem singulis anni diebus, centum dies de iniunctis, seu alias debitiss poenitentiis, in forma Ecclesiae consueta relaxamus.

§. 13. Denique ut ii, qui in diebus Stationum eiusdem ecclesiae Lateranensis in Missali Romano descriptis, videbilet Dominica prima Quadragesimæ, Dominica Palmarum, feria V in Coena Domini, sabbato sancto, sabbato in Albis, feria III Rogationum et sabbato in vigilia Pentecostes, aliquam ex dictis ecclesiis aliisque superius expressis, cum dicto poenitentiae affectu et confessionis proposito visitaverint ibique, ut præfertur, oraverint, indulgentias stationales, quas visitantes dictam ecclesiam Lateranensem iisdem diebus consequuntur, ipsi quoque, perinde ac si eamdem ecclesiam personaliter visitarent, consequi possint similiter concedimus et indulgemus.

V.

Constitutio de lege Franciscalium  
Tertii Ordinis Saecularis.

LEO EPISCOPUS  
SERVUS SERVORUM DEI  
AD PERPETUAM REI MEMORIAM.

Misericors Dei Filius, qui, suavi iugo et levi onore hominibus imposito, omnium vitae et saluti consuluit, Ecclesiam a se conditam non potestatis solum sed etiam misericordiae suae reliquit heredem, ut parta per ipsum beneficia ad omnes saeculorum aetates eodem semper caritatis tenore propagarentur. Propterea quemadmodum in iis, quae Jesus Christus in omni vita vel gessit vel præcepit, mitis illa sapientia et invictae magnitudo benignitatis eluxit, sic pariter in singulis christiana reipublicae institutis mira quedam eminet indulgentia et lenitas, ut plane vel in hac ipsa re similitudinem Dei, qui *caritas est*<sup>1)</sup>, gerere Ecclesia videatur. Illud est autem munus pietatis huius maternae maxime proprium, accommodare sapienter leges, quoad fieri potest, ad tempora, ad mores, et in præcipiendo exigendoque summa semper aequitate uti. Atque huiusmodi consuetudine caritatis simul et sapientiae efficitur, ut immutabilitatem doctrinae absolutam et sempiternam cum prudenti disciplinae varietate Ecclesia coniungat.

Hac Nos ratione animum et mentem Nostram in gerendo Pontificatu conformantes, officii Nostri ducimus eo, quo aequum est, iudicio aestimare naturam temporum, et omnia circumspicere, ne quem difficultas deterreat ab utilium exercitatione virtutum, Et nunc quidem perpendere

<sup>1)</sup> I Ioan. iv, 16.

ad banc normam placuit sodalitatem Franciscalium *Ordinis Tertii*, qui *saecularis* dicitur, diligenterque statuere num leges eius modice temperari ob mutata tempora oportet.

Praeclarum istud Francisci patris institutum vehementer pietati christianorum commendavimus per litteras Encyclicas *Auspicato*, quas die XVII Septembris anno superiore dedimus. Dedimus autem hac voluntate atque hoc unice proposito, ut quanto plures possent ad sanctitatis christiana laudem invitatione Nostra tempestive revocarentur. Origo quippe est maxima et malorum quae premunt, et periculorum quae metuuntur, neglecta christiana virtus: alteris vero mederi, atque altera deprecari non alia homines ratione possunt, quam maturando privatim et publice ad Iesum Christum reditu, *qui salvare in perpetuum potest accedentes per semetipsum ad Deum*<sup>1)</sup>. Iamvero in curandis Iesu Christi praeceptis instituta Franciscalia tota sunt posita: neque enim quicquam spectavit aliud auctor sanctissimus, quam ut in iis, velut in quadam palaestra, diligentius vita christiana exerceretur. Profecto Ordines Franciscales duo priores, magnarum virtutum informati disciplinis, perfectius quiddam divinusque persequuntur: sed paucorum sunt, nempe eorum quibus Dei munere concessum est ad evangelicorum consiliorum sanctitatem singulari quadam alacritate contendere. Verum Tertius Ordo natus aptus est multitudini: et quantum possit ad mores iustos, integros, religiosos, superiorum temporum monumenta et res ipsa declarat.

Auctori autem et adiutori bonorum consiliorum Deo acceptum referre debemus, quod illis cohortationibus nostris clausae aures populi christiani non fuerunt. Imo vero plurimis ex locis perfertur excitata erga Franciscum Assisensem pietas, auctusque passim numerus sodalitatem Tertiis Ordinis expetentium. Quapropter velut incitamenta curren-

<sup>1)</sup> Hebr. VII, 25.

tibus praebituri, illuc decrevimus cogitationem intendere, unde impediri aut retardari aliquatenus posse animorum salutaris iste cursus videbatur. Et primum quidem perspeximus, Regulam Tertiis Ordinis, quam Nicolaus IV Decessor Noster probavit confirmavitque Constitutione Apostolica *Supra Montem* die XVIII Augusti MCCLXXXIX, non omnino iis, quibus nunc vivitur, temporibus atque moribus respondere. Hinc cum expleri suscepta officia sine molestia et labore nimio non possint, pleraque legum capita condonare sodalium precibus hactenus necesse fuit: quod quidem sine disciplinae communis detimento fieri non posse, facile intelligitur.

Deinde alia quoque in eadem sodalitate erat caussa, quae Nostras sibi curas vindicaret. Nimirum Romani Pontifices Decessores Nostri Tertium Ordinem iam inde a natali suo summa benevolentia complexi, Indulgentias complures et satis amplas in expiationem admissorum sodalibus concedere. Quarum ratio effecta est annorum decursu perplexior: atque illud in contentionem saepe veniebat, num de pontificali indulgentia certis in caussis constaret, et quo tempore, quo genere eadem uti fas esset. Certe desiderata non est Apostolicae Sedis hac in re providentia: ac nominatim Benedictus XIV P. M. Constitutione *Ad Romanum Pontificem* die xv Martii anno MDCLLI tollendas priores dubitationes curavit: non paucas tamen, ut fere fit, denuo attulit dies.

Quamobrem huiusmodi incommodorum cogitatione ad ducti, ex sacro Consilio Indulgentiis sacrisque reliquis tuendis praeposito aliquot S. E. R. Cardinales destinavimus, qui leges Tertiatorum pristinas cum cura recognoscerent; item Indulgentias et privilegia omnia in commentarium relata examinarent: adhibitoque intelligenti iudicio, hac de re ad Nos referent, quid retinendum quidve novandum pro temporum conditione censuissent. Transacto, uti imperatum erat, negotio, ii, quidem Nobis auctores fuerunt,

leges veteres flecti atque accommodari ad has recentes vivendi consuetudines oportere, cum quorundam capitum immutatio nonnulla. De Indulgentiis vero, ne qui relinquatur haesitandi locus, prohibendique causa periculi ne quid non iure fiat, arbitrati sunt, Nos ad exemplum Benedicti XIV sapienter utiliterque facturos, si revocatis abrogatisque Indulgentiis omnibus, quae hactenus valuerant, alias quasdam ex integro eidem sodalito decreverimus.

Ergo quod bonum felisque sit, Dei gloriam amplificet, et pietatis virtutumque ceterarum studia magis accendat, Nos his Litteris auctoritate Nostra apostolica Legem Franciscalium Ordinis Tertiī, qui *saecularis* dicitur, eo modo quo infra descripta est, novamus et sancimus. Quo tamen facto nihil demptum de ipsa Ordinis natura putetur; quam omnino volumus immutatam atque integrā permanere. Praeterea poenarum remissionibus, seu Indulgentiis, privilegiisque, quae infra in indice recensentur, eosdem sodales uti posse volumus et iubemus, sublatis penitus Indulgentiis privilegiisque universis, quae eidem sodalito haec Apostolica Sedes quocumque vel tempore, vel nomine, vel forma ante hanc diem concesserat.

## LEX

### SODALIUM FRANCISCALIUM TERTII ORDINIS QVI SAECULARIS DICITUR.

#### CAP. I.

##### DE COOPTATIONE, TIROCINIO, PROFESSIONE.

§. I. Ne quos cooptari liceat, nisi maiores quatuordecim annorum, eosque bene moratos, retinentes concordiae, atque in primis sanctitate professionis catholicae probatos, spectatoque erga Ecclesiam Romanam Sedemque Apostolicam obsequio.

§. II. Nuptae, nisi sciente et consentiente viro, ne cooperentur, extra quam si secus videatur faciendum, auctore sacerdote conscientiae ipsarum iudice.

§. III. Adlecti in sodalitatem *scapulare* parvum unaque cingulum de more gerant: ni gesserint, statis privilegiis iuribusque careant.

§. IV. Qui quaeve Tertium Ordinem inierint, unum ipsum annum tirocinio exigant: mox, Ordinem rite professi, servaturos sese iura Dei, obedientes Ecclesiae dicto futuros; si quid in iis, quae professi sunt, deliquerint, satis facturos singuli spondeant.

#### CAP. II.

##### DE DISCIPLINA VIVENDI.

§. I. Sodales Tertiī Ordinis in omni cultu habituque, sumptuoso eleganter posthabita, teneant eam, quae singulos deceat, mediocritatis regulam.

§. II. Choreis ludisve scenicis procacioribus, item comisationibus perquam caute abstineant.

§. III. Pastu atque potu utantur frugaliter: neve ante vel accumbant vel assurgent de mensa, quam invocato pie granteque Deo.

§. IV. Ieiunium Mariae Virgini Immaculatae, item Francisco Patri, pridie sacra solemnia, singuli servanto: admotum laudabiles, si qui praeterea vel ieiunium in sextas, vel abstinentiam carnium in quartas quasque ferias servarint, disciplina yeteri Tertiiorum.

§. V. Admissa rite expianto per menses singulos: item ad divinum epulum accendant per menses singulos.

§. VI. Tertiarios ex ordine Clericorum, quod Psalmis quotidie dant operam, nihil praeterea hoc nomine debere placet. Laici, qui nec canonicas, neu Mariales preces, vulgo *Officium parvum B. M. V.*, persolvunt, precationem

Dominicam cum Salutatione Angelica et *Gloria Patri* adhibeant duodecies in dies singulos, excepto si per valetudinem non liceat.

§. VII. Quibus est testamenti factio, ii suo quisque tempore de re sua testentur.

§. VIII. In familiari vita studeant ceteros exemplo antecedere: pietatis artes, resque optimas provehere. Libros vel diaria, unde pernicies virtuti metuatur, domum suam inferri, ab iisque, qui in ipsorum potestate sint, legi ne sinant.

§. IX. Caritatem benevolam et inter se et ad alienos sedulo tueantur. Componendas, sicubi possunt, discordias curent.

§. X. Iusurandum ne iurent unquam, nisi necessario. Turpia dictu, scurriles iocos fando fugiant. Executant sese vesperi, num tale quidquam temere fecerint: si fecerint, errorem poenitendo corrigant.

§. XI. Rei divinae, qui commode possunt, quotidie intersint. Ad coetus menstruos, quos Praefectus indixerit, convenient.

§. XII. Conferant in commune pro facultate quisque sua nonnihil, unde vel tenuiores e sodalium numero, praesertim affecta valetudine, subleventur, vel divini cultus dignitati consulatur.

§. XIII. Ad sodalem aegrotantem Praefecti vel adeant ipsi, vel mittant, qui caritatis officia expletat. Idem, in morbo ancipi, moneant suadeant, ut quae ad expiandum animum pertinent, aegrotus tempestive curet.

§. XIV. Ad exequias sodalis demortui sodales municipes hospitesve convenient, simulque Mariales preces instituto Dominici Patris, id est *Rosarium*, tertiam partem ad caeleste demortui solatium adhibeant. Item sacerdotes inter rem divinam, laici, si poterunt, sumpta Eucharistia, pacem fratri defuncto sempiternam pii volentes adprecentur.

CAP. III.

DE OFFICIIS, DE VISITATIONES, DEQUE IPSA LEGE.

§. I. Officia, advocatis ad conventum sodalibus, defenantur. Eadem triennalia sunt. Oblata ne qui sine causa iusta recuset, neu oscitander gerat.

§. II. Curator, qui *Visitator* audit, diligenter quaerat, satisne salvae leges. Eius rei ergo, sodalitiorum sedes in singulos annos, eoque crebrius, si res postulaverit, pro potestate circumeat, coetumque habeat, Praefectis sodalibusque universis adesse iussis. Si quem *Visitator* ad officium monendo iubendo revocarit, sive quid, salutaris poenae nomine, in quemquam decreverit, hic modeste accipiat, idemque luere ne abnuat.

§. III. *Visitatores* ex Primo Franciscalium Ordine, vel ex Ordine Tertio Regulari legantur, quos Custodes seu *Guardiani*, si id rogati fuerint, designabunt. *Visitatoris* munere laicis viris interdictum esto.

§. IV. Sodales nec obedientes et noxii iterum et tertium admoneantur officii sui: ni pareant, excedere Ordine ubeantur.

§. V. In his legibus si qui forte quid deliquerint, hoc se nomine culpam suscepturos nullam sciant, exceptis iis quae iure divino Ecclesiaeve legibus alioqui praecipiuntur.

§. VI. Si quae huius capita legis quemquam servare caussa gravis et iusta prohibeat, eum ex ea parte lege solvi, eademve capita commutari prudenter licet. Cuius rei Praefectis ordinariis Franciscalium et Primi Ordinis et Tertiis, item *Visitatoribus* supra dictis facultas potestasque sit.

## INDEX

### INDULGENTIARUM ET PRIVILEGIORUM.

#### CAP. I.

##### DE INDULGENTIIS PLENARIIS.

Tertiariis ex utroque sexu singulis, qui admissorum confessione ritu christiano expiati sacram Eucharistiam sumpserint, Indulgenciam plenariam consequendi ius sit, diebus et caussis quae infra scriptae sunt:

I. Die aditiali:

II. Quo die singuli Ordinem primitus profitentur:

III. Quo die ad concionem menstruam seu *Conferentiam* convenient, si modo templum aliquod publicumve sacram pietatis caussa adierint, remque christianam Deo de more commendaverint.

IV. Die iv Octobris, natali Francisci Patris legiferi: die xii Augusti, natali Clarae Virginis legiferae: die ii Augusti, festo Mariae Angelorum reginae ob Basilicam eius dedicatam: item quo die solemnia anniversaria aguntur Sancti caelitis, in cuius templo sedes est sodalitii constituta, si modo ipsum templum pietatis caussa celebraverint, remque christianam Deo de more commendaverint:

V. Semel per menses singulos, quo die cuique placuerit, si modo templum aliquod publicumve sacrarium pietatis caussa adierint, et aliquandiu ad mentem Pontificis maximi obsecrando perstiterint:

VI. Quoties, potioris vitae studio, per octo dies continuos statim animi meditationibus operam daturi secesserint:

VII. Item morituris, si sanctum salutare nomen Iesu aut voce, aut, si loqui posse desierint, voluntate implorave-

rint. Idem eodem iure fruantur, si nec compotes sacra Confessione atque Eucharistia, animi dolore culpas expiarerint.

VIII. Bis in anno *Beuedictionem summi Pontificis nomine* accepturis, si ad mentem ipsius Pontificis Deo aliquandiu supplicaverint: itemque, hac ipsa supplicandi lege, accepturis quam appellant *Absolutionem*, hoc est *Benedictionem*, per hos dies qui infra scripti sunt: i. Natali Domini Nostri Iesu Christi: ii. die solemni Paschatis Resurrectionis: iii. die solemni Pentecostes: iv. in festo Santiissimi Cordis Iesu: v. item Immaculatae Conceptionis B. Mariae Virginis: vi. Iosephi sponsi eius die xix Martii: vii. Impressionis SS. Stigmatum Francisci Patris die xv Septembbris: viii. Ludovici regis Galliarum, Patroni caelestis salutaris sodalium ex Tertio Ordine die xxv Augusti: ix. Elisabeth Hungaricae die xix Novembbris.

IX. Item semel in mense, si qui *Pater, Ave et Gloria Patri* quinques pro incolumente rei christiana, semel ad mentem Pontificis maximi recitaverint, ii iure omni ad expiandas animi labes fruantur, quo fruntur et qui stativa in Urbe supplicia obeunt, et qui Portiunculam, Hierosolymitanam loca sanctissima, aedem Iacobi Apostoli Compostelensem, religionis caussa, celebrant.

X. Quibus diebus stativae supplicationes in Missali Romano designantur, si templum sacrariumve, in quo sedes est sodalitii constituta, adierint, remque christianam Deo de more commendaverint, in eodem templo sacrariove per eos ipsos dies amplissimo iure fruantur, quo in Urbe cives hospitesve fruantur.

#### CAP. II.

##### DE INDULGENTIIS PARTIALIBUS.

I. Tertiariis ex utroque sexu singulis, si templum sacrariumve, in quo est sedes sodalitii constituta, celebra-

verint, Deoque pro rei christianaee incolumitate supplicaverint quo die sacra Stigmata Francisco Patri divinitus impressa sunt, item festo sanctorum Ludovici regis, Elisabeth reginae Lusitaniae, Elisabeth Hungaricae, Margaritae Cortonensis, itemque aliis duodecim diebus, quos singuli maluerint et Praefectus Ordinis probarit, ea supplicatio septennis septiesque quadragenae satisfactionis instar sit.

II. Quoties Missae aliisve divinis officiis, vel sodalium conventibus publicis privatisve interfuerint: inopes hospitio acceperint: dissidia composuerint, componendave curant: in pompam rite ductam prodierint: Sacramentum Augustum, cum circumfertur, vel comitati sint, vel, si comitari nequierint, ad campani aeris signum precationem Dominicam cum Salutatione Angelica semel recitaverint: quinques precationem et salutationem eamdem recitaverint rei christianaee, vel animabus sodalium defunctorum Deo commendandis: hominem mortuum extulerint: devium quemquam ad officium reduxerint: Dei praecepsis certisque ad salutem necessariis quempiam erudierint: aut aliud quippiam ex hoc genere caritatis egerint, toties, singulis eorum, harum rerum singularum caussa, tercentos de poenaliis dierum numero expungere liceat.

Tertiariis, si malint, omnibus et singulis indulgentiis supra dictis, sive *plenariis* sive *partialibus*, labes poenaque defunctorum expiare liceat.

### CAP. III.

#### DE PRIVILEGIIS.

I. Sacerdotibus ex ordine Tertiariorum ad quodlibet altare facientibus, tribus ex qualibet hebdomade diebus, perlitare fas sit, modo ne similem perlitandi facultatem in alium diem impetraverint.

II. Qui sacrum fecerit animabus sodalium defunctorum

expiandis, is ubicumque veniae defuncto impetrandaee perlitato.

Atque haec omnia et singula, ut supra decreta sunt, ita firma, stabilia, rata in perpetuum esse volumus: non obstantibus Constitutionibus, Litteris Apostolicis, statutis, consuetudinibus, privilegiis, aliisque Nostris et Cancellariae Apostolicae regulis, et contrariis quibuscumque. Nulli ergo hominum liceat has Litteras Nostras ullo modo, ullave ex parte violare. Si quis autem adversus eas tale quicquam ausit, indignationem omnipotentis Dei, et beatorum Petri et Pauli Apostolorum eius se noverit incursum.

Datum Romae apud S. Petrum, anno Incarnationis Dominicae Millesimo octingentesimo octogesimo tertio, III Kalendas Iunias, Pontificatus Nostri Anno Sexto.

C. CARD. SACCONI PRO-DATARIUS — TH. CARD. MERTEL

#### VISA

DE CURIA I. DE AQUILA E VICECOMITIBUS  
I. CUGNIONIUS.

#### VI.

#### Breve SS. D. N. Leonis Papae XIII

*qno praescribuntur formulae benedictionum  
ac absolutionum generalium  
servandae ab omnibus Ordinibus Regularibus ac Tertiariis.*

#### LEO PP. XIII. ad futuram rei memoriam.

Quo universi utriusque sexus fideles in tertium Sancti Francisci Assisinatis Ordinem adscripti easdem leges eosdemque ritus in obeundis Instituti sui functionibus adhibere possint, enchiridion seu manuale unicum typis edere visum est. Multiplices vero sub eiusdem manualis editionem exortae sunt de absolutionis tum generalis, tum in articulo

mortis, tum de Papalis benedictionis formulis controversiae, ad quas dirimendas Consilio Venerabilium Fratrum nostrorum S. R. E. Cardinalium Indulgentiis Sacrisque Reliquis praepositorum nonnulla proposita sunt dubia seu quaestiones. Hinc Consilium idem consideratis perpensisque omnibus, quid de huiusmodi quaestionibus deliberaverit, per Secretarium suum ad Nos referendum curavit. Nos autem, quibus salutare frugiferumque tertii Ordinis S. Francisci Sodalitum in deliciis semper fuit, Nobisque summopere cordi est, ut illud sanctas sui Instituti leges ritusque observet, atque in dies, hisce praesertim temporibus, propagetur et incrementa suscipiat, memorati Consilii deliberationem probavimus, eamque omnibus per Congregationis Venerabilium Fratrum nostrorum S. R. E. Cardinalium Sacris Ritibus tuendis cognoscendis decretum indicandam censuimus. Nostris mandatis obsequens Congregatio, sibique demandatum munus meliori quo fieri possit modo explere cupiens, opportunum in primis duxit omnes et singulas benedictionis et absolutionis generalis expendere formulas, quae nedum penes Tertiarios Franciscales, verum etiam apud alias eiusdem Ordinis familias, imo et alias Regulares Ordines ac Tertiarios ad ipsos pertinentes essent in usu, quo unam eamdemque ab omnibus in posterum respective in eiusmodi benedictionibus et absolutione adhibendam formulam concinnaret. Quamobrem praefata Congregatio omnes, quorum intersit, monendos putavit, ut siquid in casu notatu dignum iudicassent, intra congruum tempus eidem Congregationi subiicerent. Exacto inde triennio, quum nihil ex parte alicuius ex dictis Ordinibus obiectum sit, Congregatio Sacris Ritibus praeposita, accurate omnibus diligenterque inspectis et expensis, quae sequuntur decrevit. nempe:

I. Pro absolutione in articulo mortis retineatur in omnibus formula praescripta a Constitutione sa. me. Benedicti Papae XIV *Pia Mater*, addito tantum ad *Confiteor* nomine sancti proprii Fundatoris.

II. Benedictio nomine Summi Pontificis impertiatur cum formula approbata in Litteris encyclicis eiusdem sa. me. Benedicti Papae XIV, *Exemplis Praedecessorum*, sed non nisi bis in anno, et sub conditione, quod haec benedictio numquam detur eodem die et in eodem loco ubi Episcopus eam impertiatur.

III. In absolutione generali pro Regularibus cuiuscumque Ordinis atque in benedictione cum indulgentia plenaria pro Tertiariis saecularibus adhibeantur omnino duae in sequentes formulae a Reverendissimo Assessore ipsius Sacrae Congregationis propositae atque ab eadem approbatae; abrogatis penitus et suppressis quibuscumque aliis formulis hucusque usitatis, videlicet:

I. *Formula absolutionis generalis pro Regularibus cuiuscumque Ordinis hoc privilegio fruentibus.*

*Antiph.* Ne reminiscaris, Domine, delicta nostra, vel parentum nostrorum, neque vindictam sumas de peccatis nostris.

Kyrie eleison. Christe eleison. Kyrie eleison. Pater noster.

¶. Et ne nos inducas in temptationem,

¶. Sed libera nos a malo.

¶. Ostende nobis, Domine, misericordiam tuam,

¶. Et salutare tuum da nobis.

¶. Domine, exaudi orationem meam,

¶. Et clamor meus ad te veniat.

¶. Dominus vobiscum,

¶. Et cum spiritu tuo.

OREMUS

Deus, cui proprium est misereri semper et parcere, suscipe deprecationem nostram, ut nos, et omnes famulos tuos, quos delictorum catena constringit, miseratio tuae pie tatis clementer absolvat.

Exaudi, quaesumus Domine, supplicum preces, et confi